



XC.

Судебный позывъ митрополиту Петру Могилѣ и его сподвижникамъ
вслѣдствіе жалобы на нихъ уніатскаго митрополита В. Рутскаго за
отобраніе Кіево-Софійскаго Собора.

1633. г. Окт. 11.

*Янушъ зъ Логойска Тышкевичъ, воевода генералъ земель киевскихъ,
староста житомирскій.*

Превелебному въ Бозе его милости отъцу Петрови Мо-
гиле, архіепископови метрополитови киевскому, галицкому,
и всее въ унії небудучое Руси и (яко се титулуеть) екз-
зарси архимандритови и всей капитуле монастыра печеръ-
скаго киевскаго, и вамъ велебной всей капитуле катедральной
киевской принціпаломъ: Анатолему Мужиловскому, Силъ-
вестрови Косъсовови, Софрониеви Почаському, Ивашковско-
му, чернѣцомъ: Даниелеви Думинскому, Андрееви и сынови
ваш. милости Иванови Предримирскѣмъ, Апостоловскому, нео-
селямъ комъпринціпаломъ учинку ниже менованого, зъ
особъ и всихъ добръ ваш. милостей лежачихъ рухомыхъ и зъ
сумъ пинежныхъ, гдѣжъ кольвекъ презъ ваш. милостей маю-
чихъ, зверхностью Короля его милости и моею владою воевод-
скою приказую, абысте В. М—сти передомною самымъ, а вне-
бытности моей передъ судомъ моимъ кгородскимъ киевскимъ,
на рочкахъ кгородскихъ киевскихъ въ року теперешнемъ
тисеча шесть сотъ тридцать третемъ, мѣсеца ноябра шес-
тнадцатаго дня, до суженъя припадающихъ на мѣстцу
звыкломъ взамку киевскомъ, до сами обличне и завите стали
на жалобу и правъное попартьє выше превелебного въ
Бозе его милости отъца Иосифа Везяміа Рутскаго, ар-
хіепископа метрополита киевскаго, галицкаго и всее въ
унії будучое Руси и капитулы его милости, которые
В. М. отъче Могило и васъ—Думинскій, Предримирские



и Апостоловскій самыхъ презъ себе, васъ зась капитула печерьская зъ притомностью тогожъ отьца Могилы архиманьдрита вашего, васъ капитула катедральная киевская зъ притомностью тогожъ предъ се отьца Могилы, яко того, которого за митрополита и пастыра своего принялисте, а васъ Мужилевскій, Коссове, Почаскій и Ивашковскій зъ притомностью старшого вашего, которого бысте себе разумели, позывають о то, ижъ В. М., отьче Могило, незаживши въ речахъ своихъ слущныхъ и правныхъ сродьковъ, але рачей заживши квалтовного способу, на право посполитое и винны внемъ на трансъгрессоровъ описанные неогледаючисе, поразумевши и спольне нарадившисе зъ В. М.-стами печарская и катедральная киевская капитулы, тудежъ зъ вами комъпринципалове, року теперешнего тисеча шесть сотъ тридцать третего, мѣсца июля дванадцатого дня, зъ немалою купою, людей такъ киевскихъ юриздицій мещанъ, а особливе Петромъ Сызоновичомъ Балыкою, Захаркомъ, Богданомъ, Веремиевкомъ и Быховцемъ слюсарами (зкоторыми всеми въ судахъ имъ належныхъ акторове правне поступити незанежаютъ) яко тежъ слугъ, бояръ, подьданныхъ и козаковъ монастыра печарского и иньшихъ, которыхъ право посполитое переходывать забороняеть, которыхъ всихъ людей было до пети або шести сотъ чоловѣка, зъ стрельбою огнистою и иньшимъ до войны належачимъ оружьемъ, такъ на церковь Светое Софии, въ Киеве на горе будучую, яко тежъ на слободу при той же церквѣ и въ вале коло места идучомъ осажоную, тудежъ на дворъ мешканя урожоныхъ пана Мартина Корсака и панее Александры Чарковского Корсаковоє малъжоньковъ, лежачій въ Киеве на горе подъ валомъ, который валъ одъ монастыра Михайловского идетъ и дворъ такъ же тежъ мешчанъ тамъ же за валомъ при дворе мешкающихъ одъ церкви Светое Софии и одъ слобожанъ здавна делить, наслали. Выtedy комъпринципалове зъ придаными собе помочниками и сприспособленными людьми, року мѣсяца и дня вышей менованныхъ, то есть дня дванадцатого июля, квалътовне арма-



но на помененый дворъ мешканя пана Корсака, наместника, поводовъ, наехавъши и до избы тое, въ которой пани Корсаковая на тотъ часъ зъ гостми кильку особъ шляхты, будучи правомъ посполитымъ обьварована, безъпечне седила, зъ тижьбою людей въ армату прибранныхъ въшедъши, домагалисе, абы имъ менованая пани Корсаковая ключи для одомъкнени церкви Светое Софии, въ поссессии поводовъ водлугъ привилею светое памяти короля его милости свежо змерлаго будучое, дала, которая при бытности гостей своихъ шляхты такъ же тежъ возныхъ двоухъ, одъ уряду приданыхъ, шляхетныхъ Яна Байкача и Богдана Речицкого, такъже стороны шляхты, при возныхъ будучихъ, пана Василия Гуляницкого и пана Александра Завадовского, кгда вамъ комъпринципалове, яко белая голова, будучи субъ потестате марити, а не сун юрисъ, невидечи привилею жадного, ани дворанина отъцу Могиле одъ короля его милости на то приданого, одъ новедила, же она росъказанья жадного одъ поводовъ внебытности манъжонъка своего, абы до одмыканья тое церкви кому ключи давати, або оную одмыкати кому позволить, любо оное уступовати мела, не маеть, и тое церкви такъ ваш. милости, отъче Могило, яко тежъ и никому инъшому неуступуетъ и одъмыкати не позволяетъ, теды вы комъпринципалове квалтовне съ крикомъ и тумулътомъ, рекши то, же мы, поведа, маемъ ключи свои и сами тую церковь одомъкнемо, а пришедъши до тое церкви такъ у воротъ, которыми на цминтаръ въходятъ, яко тежъ у церкви ку закрисей, колодъки подьбиявъши обухами и поодътинавши шаблями, до церкви вошли и оную квалтовне подъ мощъ ваш. милости, отче Могило, загорнули, книги и апъпараты вси и што колъвекъ тамъ нашли забрали, подъ который часъ одъбиванья колодокъ, кгда челядникъ панее Корсаковое Миколай Иваницкй реклъ тебе, комъпринципале Мужилевскй, и вамъ инъшимъ вышъ помененымъ комъпринципаломъ при вышей менованныхъ возныхъ, абысте колодокъ неодъбияли, теды вы, неушановавъши мейста светого, оного обухами целютостиве у воротъ цминтаровыхъ



побили, а потомъ, справивши то и вернувшись одъ церкви, тогожъ дня дванадцатаго июля ещѣ зъ большимъ людомъ и зъ тыми, которые по заплоткахъ въ засадѣ были, кгвалтовне повторе арматно на дворъ помененый нашедши, а зобравши мощью, кгвалтомъ войтовъ—одного зъ слободы, а другого зъ местечка зъ слобожаны при Светой Софии и зъ мешчаны, за валомъ при дворе мешкающими, онымъ росказали, абы, жадныхъ повинностей и посълушенства его милости отъцу Рутъскому, митрополитови и капитуле, такъже намеснекови ихъ помененому пану Мартинови Корсакови и мальжонце его неодъдавали, а затымъ гурмомъ, до избы въ шедши и гостей шляхты неушановавши, заразомъ паней Корьсаковой зъ двора, непозволивши оной румации до приезде зъ консьервать самого пана Корсака, ани тежъ водлугъ права на недель килька (любю она васъ комъпринципалове при возныхъ и шляхте гостей, людяхъ зацныхъ, о то просила) уступовать казалисте, оную словы ушчинливими, гонору ее шляхецкого поцтивого белоголовского не ушановавши, зельжилисте презъ кватеры, стрельбу огънистую въ окна въкладаючи до панее Корсаковое, такъже тежъ до пановъ Станислава и Яроша Корсаковъ сыновъ ее и до челяди стрелять хотелисте, волаючи: „выволочмо ее, мовить, на дворъ и розсытрелиймо„, штобысте певие были учинили, бы были васъ одъ того неодвели такъ гости шляхта, яко тежъ и духовные особы отъцове доминикани и отъцове бернардыни, зкоторыхъ чотырохъ подъ тотъ же часъ папи Корсаковая, будучи одъ некоторыхъ особъ перестережена, же пришлое пощп, яко то зъ дня помененого дванадцатаго на день тринадцатый июля, въ небезъпеченстве здорвье ее одъ тыхъ наездниковъ оставить мело, до себе была возвала, одъ того васъ комъпринципаловъ неодвели, и такъ маючи щчось троха респекту такъ на особъ духовныхъ, яко тежъ и на гостей шляхту, которые ажъ до змерканья тамъ бавилисе, заледво паней Корсаковой зъ дня помененого дванадцатаго на день тринадцатый июля въ томъ дворе переночовать далисте.



Назавѣтрее засѣ, дня тринадцатого ранесенько яко знову на паню Корсакову такъ наступилесте вы комъпринципалове, же въпродѣ особѣ духовныхъ каплановъ, неушановавши стану ихъ духовного, зъ двора потручаючи оныхъ которымъ салва до чиненья о то правомъ не загорожаетъ се) выпѣхнули, а потомъ, недбаючи ничего на листъ пана наместника замъку киевского, презъ который панъ наместникъ за афѣктацию панее Корсаковое васъ комъпринципаловъ напоминалъ (или въпрудкомъ часе), абысте не перъ вимъ, але рачей перъ медиа юрисъ себе въ той мере поступовали, паню Корсакову за руку взявши за ворота зъ двора одъ всего выпровадили, такъже тежъ сыновъ ее вышей помененныхъ Станислава и Яроша Коръсаковъ, при бытности некоторыхъ приятель, тудежъ челядъ зъ двора прочъ выгнали, и такъ поводовъ теперешнихъ такъ зъ церкви Светое Софии и слобожанъ, яко тежъ зъ двора и мешчанъ приемъ мешкающихъ выбили и квалтовне вытиснули, а подъ моцъ и владзу В. М.-сти принципале, отъче Могило, загорнули, въ дворе засѣ, южъ выгнавши з онаго паню Корсакову, поодбывавши коморы, свирни, пивъници што колвекъ въ коморахъ лекгуминъ было и въ пивницахъ медовъ, пива и горелокъ,—то все побрали, маетность засѣ и спрятъ домовый пана Корсаковъ и малжонъки его што колвекъ тамъ въ тыхъ-коморахъ было на свои подводы беручи с коморъ кидали и на долъ до двора его мил. пана подъяшого киевскаго, въ которомъ пани Корсакова з того погрому резидовала, возили, подъ который часъ немало речей погинуло, а потомъ дня семънадцатого июля въ теперешнемъ же року самъ В. М., принципале отче Могило, зъ великимъ оршакомъ людей зъ дѣлами квалтовне наехавши въ томъ же дворе поводовъ мешканья пана Ковсака, наместника ихъ, а зъ онымъ и В. М. другие принъципалове станулисте церковь Светое Софии зъ слобожаны и дворъ зъ мешчану, а въ томъ же местечку церкви три: перъшую деревяную Светого Миколы названого десетинного, другую тежъ деревяную Светого Семена, во-



дле брамы месцкое на горе лежачую, а третюю мурованую
Светого Василия, названого нагорного, подъ себе, права и пре-
тексту жадного до нихъ немаючи, загорнули, а поводовъ с то-
го всего кгвалтовне выбили и вытиснули, презъ што праву
посполитому В.М., принъципалове и комъпринципалове, про-
тивными сталисе, въ вини правные попали и поводовъ до
шкодъ на петънадцать тисечей золотыхъ ошадованныхъ зъ
битъя походячихъ (не инъклюдуючи в то церквей, такъже
слободы, местечка, двора и пожитковъ) приправили, о чемъ
всемъ протестация и возныхъ реляция, инъ реценти одъ ак-
торовъ о то противъко ваш. милостямъ учиненные, ширей въ собе
объмовляють, водлугъ которое протестации, кгда поводы
королеви его мил., пану нашому милостивому, тотъ таковой
поступокъ В. М-стей реферовали, король зась его мил. з ласки
своее панское рачилъ до В. М. принъципале, отче Могило,
писати, ганечи таковой поступокъ В. М. кгвалтовный и рос-
казуючи, абьсь слободы, местечка и дворъ поводомъ, зъ ко-
торыхъ оныхъ зъ сполпринципалами и комъпринципа-
лами своими выбилъ, привернулъ, до мене зась писати ра-
чилъ, ижъ еслибьсь его кор. милости противнымъ былъ и то-
го всего поводомъ не вступилъ, абьмъ я то урядови моему
воеводскому поручивши, тотъ дворъ, местечко и слободу отъ
ваш. милости одобралъ и поводомъ подалъ, а тотъ листъ до ваш.
милости отъ его кор. мил. и другій одъ мене о томъ же писа-
ные акторове презъ двохъ возныхъ и шляхту ваш. милости од-
дали и о уступенъе двора, слободы и местечка реквизиовали,
теды В.М., отъче Могило, порозумевшисе зъ инъшими принци-
палами и комъпринъципалами своими выше поменеными, одъ-
поведилесь, ижъ, мови, о томъ не мышлю, абьмъ мелъ ус-
туповати того двора, слободы и местечка отъцу Рутъскому
и его капитуле, а ешче и то придаlescъ ваш. милость, ижъ,
мови, втотъ часъ уступлю коли мя зтондъ, зъ двора зъоного,
выволокутъ, о чомъ реляция возныхъ ширей светъчить, а
такъ поводе, заховавши салву собе до чиненя правомъ
презъ позовъ особливый о кгвалтовное выбитъе зъ церкви
Матеріалы для истор. запад. русск. церкви.



Светое Софии и зъ пнѣшихъ вышей менованыхъ трохъ церквей, пану Корсакови засъ и малжонѣе его о зиевагу и о шкody, и грабежи притомъ выбитью сталые, а слuze ихъ Миколаеви Иваницкому о бой и раны при церкви Светое Софии заданные и о вины правные на тотъ часть, прихилиючисе до протестации своее и всего втой справе зашлого поступьку, позывають ваш. милостей всихъ на терминъ озъначоный, жебысьте ваш. милос. стали, тотъ дворъ, слободу и местечко зо всеми слабoжаны, мешчаны, огородами и принадлежностями, водълугъ права посполитого, лисьту его королевское милости и самое слушности, поводомъ до поссесъсии приверънули, вины правные заплатили, шкody вышъ менованные нагородили и на то все што ваш. м-стямъ часу права одъ акторовъ ширей словы дeвeдeно и объяснено будетъ, правне одъповедаючи, скутечнeсe во всемъ усьправедливили, ведаючи о томъ, ижъ любъ станете любъ нѣ, тeдъ я одънакъ въ той справе противько ваш. м-стямъ водълугъ права, листу и воли его кор. мил. поступилю и судъ мой поступить. Писанъ въ замъку киевскомъ, року тисеча шесть сотъ тридцать третего, мѣсяца октобра одинадцатого дня.

(Съ копiи, хранящейся въ архивъ греко-уніатскихъ митроп. при св. Синодѣ).

ХСІ.

Судебное заявленіе „вознаго енерала“ кiевскаго воеводства о врученiи имъ „позвовъ“ Петру Могилѣ и другимъ лицамъ, обвиняемымъ уніатами въ незаконномъ присвоенiи нѣкоторыхъ церквей и грунтовъ въ Кiевѣ.

1633 г. декаб. 16.

Выпись съ книгъ кiродскихъ воеводства киевскаго.

Року тисеча шесть сотъ тридцать третего мѣсяца Декабра шестнадцатого дня